




**PRAVILNIK O PRIZNANJIMA I
NAGRADAMA
UNIVERZITETA U SARAJEVU**



Univerzitet u Sarajevu



University of Sarajevo

**PRAVILNIK O PRIZNANJIMA I
NAGRADAMA
UNIVERZITETA U SARAJEVU**

Sarajevo, februar 2021. godine

Na osnovu člana 130. Zakona o visokom obrazovanju („Službene novine Kantona Sarajevo“, broj: 33/17, 35/20 i 40/20) i člana 59, a u vezi sa članom 231. Statuta Univerziteta u Sarajevu, Senat Univerziteta u Sarajevu je na 24. elektronskoj sjednici održanoj 24. 02. 2021. godine, donio

PRAVILNIK O PRIZNANJIMA I NAGRADAMA UNIVERZITETA U SARAJEVU

I. OPĆE ODREDBE

Član 1.

Pravilnikom o priznanjima i nagradama Univerziteta u Sarajevu (u daljnjem tekstu: Pravilnik) utvrđuju se vrste priznanja i nagrada koje dodjeljuje Univerzitet u Sarajevu, te uvjeti i postupak za dodjeljivanje istih.

Član 2.

Priznanja i nagrade Univerziteta u Sarajevu (u daljnjem tekstu: priznanja Univerziteta) mogu se, pod uvjetima i postupcima utvrđenim ovim pravilnikom, dodijeliti:

- a) studentima koji su uspješno okončali prvi ciklus studija,
- b) studentima koji su uspješno okončali integrirani studij,
- c) studentima koji su uspješno okončali drugi ciklus studija,
- d) Statutom definiranom osoblju Univerziteta u Sarajevu,
- e) organizacionim i podorganizacionim jedinicama Univerziteta kao i
- f) domaćim i stranim fizičkim i pravnim licima.

II. VRSTE PRIZNANJA I NAGRADA

Član 3.

- (1) Studentima koji su uspješno okončali studij pod tačkama a), b) i c) iz prethodnog člana, uz ispunjenje ostalih uvjeta predviđenih ovim pravilnikom, vrednujući meritokratiju, promičući izvrsnost, s ciljem postizanja boljeg uspjeha na studiju, razvijanja interesiranja kod studenata za naučnoistraživački, umjetnički i stručni rad, te podsticanja kreativnog i kritičkog mišljenja studenata, kao i za doprinos afirmaciji Univerziteta, dodjeljuju se sljedeće vrste priznanja:
 - *Zlatna značka Univerziteta u Sarajevu,*
 - *Srebrna značka Univerziteta u Sarajevu i*
 - *Povelja Univerziteta u Sarajevu.*
- (2) Za izuzetna dostignuća, značajan doprinos u radu i zasluge u nastavnoj, naučnoj, umjetničkoj, kulturnoj, sportskoj i drugim djelatnostima Univerziteta fakultetima, akademijama, centrima, institutima Univerziteta i osoblju Univerziteta mogu se dodijeliti sljedeće vrste priznanja:
 - *Medalja Univerziteta u Sarajevu,*
 - *Plaketa Univerziteta u Sarajevu,*
 - *Zahvalnica Univerziteta,*
 - *Ambasador Univerziteta i*
 - *Nagrada za mir i progres.*

Član 4.

Priznanje *Zlatna značka* dodjeljuje se za postignuti izuzetan uspjeh u studiju studentima fakulteta, akademija, centara Univerziteta u Sarajevu koji su u redovnom roku odbranili završni rad i završili:

- a) I ciklus studija do 30. 9. kalendarske godine, s tim da im srednja/prosječna ocjena iz svih položenih ispita u toku studija nije niža od 9,50 (devet zarez pedeset);
- b) integrirani studij do 30. 9. kalendarske godine, s tim da im srednja/prosječna ocjena iz svih položenih ispita nije niža od 9,50 (devet zarez pedeset);
- c) II ciklus studija do 30. 9. kalendarske godine, a odbranili završni rad do 1. 11. kalendarske godine, s tim da im srednja/prosječna ocjena iz svih položenih ispita u toku I i II ciklusa studija nije niža od 9,50 (devet zarez pedeset).

Član 5.

Priznanje *Srebrna značka* dodjeljuje se za postignuti uspjeh u studiju studentima fakulteta, akademija, centara Univerziteta u Sarajevu koji su u redovnom roku odbranili završni rad i završili:

- a) I ciklus studija do 30. 9. kalendarske godine, s tim da im srednja/prosječna ocjena iz svih položenih ispita nije niža od 9,00 (devet);
- b) integrirani studij do 30. 9. kalendarske godine, s tim da im srednja/prosječna ocjena iz svih položenih ispita nije niža od 9,00 (devet);
- c) II ciklus studija do 30. 9. kalendarske godine, a odbranili završni rad do 1. 11. kalendarske godine, s tim da im srednja/prosječna ocjena iz svih položenih ispita u toku I i II ciklusa studija nije niža od 9,00 (devet).

Član 6.

Povelja Univerziteta u Sarajevu dodjeljuje se najboljem studentu tog fakulteta, akademije, centra, čija je srednja/prosječna ocjena niža od 9,00 (devet) u slučaju kada nijedan student ne završi studij sa uspjehom u skladu sa članovima 4. i 5. ovog pravilnika.

Član 7.

- (1) Priznanja iz članova 4, 5. i 6. ne mogu dobiti studenti Univerziteta koji su u posljednjoj studijskoj godini odslušali sve predmete i stekli tzv. apsolventski staž, a odbranili završni rad do 1. 11. kalendarske godine, budući da isti ne ulazi u redovan rok zakonom predviđenog trajanja studija, kao ni studenti kojima je tokom studija izrečena disciplinska mjera zbog kršenja normi predviđenih Statutom i važećim pravilnicima.
- (2) U iznimnom slučaju priznanja iz prethodnog stava mogu dobiti i studenti kojima su mirovala prava i obaveze godinu dana u skladu sa opravdanim razlozima utvrđenim Statutom.

Član 8.

Medalja Univerziteta u Sarajevu je priznanje koje se dodjeljuje alumnijima Univerziteta i pojedincima koji su afirmirali vrijednosti Univerziteta, kao i za izuzetna dostignuća u nastavnim, naučnim, umjetničkim, kulturnim, sportskim i drugim djelatnostima na domaćem i međunarodnom nivou.

Član 9.

Plaketa Univerziteta je priznanje koje se dodjeljuje za izuzetne zasluge organizacionim i

podorganizacionim jedinicama Univerziteta, članovima akademskog i naučnoistraživačkog osoblja organizacionih i podorganizacionih jedinica Univerziteta i Rektorata Univerziteta za saradnju sa domaćim i inozemnim univerzitetima i drugim institucijama sa Univerzitetom, za značajan doprinos u radu ili razvoju Univerziteta i visokog obrazovanja te za izuzetna nastavna, naučna, umjetnička, kulturna i sportska dostignuća.

Član 10.

Zahvalnica Univerziteta u Sarajevu je priznanje koje se dodjeljuje za poseban doprinos radu i dugogodišnji uspješan rad osoblju Univerziteta.

Član 11.

Ambasador Univerziteta je priznanje koje se dodjeljuje stranim fizičkim licima za promociju aktivnosti Univerziteta na međunarodnom nivou.

Član 12.

Nagrada za mir i progres dodjeljuje se domaćim i stranim fizičkim i pravnim licima za izuzetan doprinos afirmaciji i ugledu u zemlji i inozemstvu, razvoju mira, humanizma i progressa.

III. POSTUPAK DODJELE PRIZNANJA I NAGRADA UNIVERZITETA

Član 13.

- (1) Prijedlog za pokretanje postupka dodjele priznanja i nagrada Univerziteta mogu dati tijela Univerziteta definirana Statutom i vijeće fakulteta, akademija, centara, instituta.
- (2) Prijedlog za pokretanje postupka upućuje se u pisanom obliku Odboru za dodjelu univerzitetskih priznanja (u daljnjem tekstu: Odbor).

Član 14.

- (1) Prijedlog za dodjelu priznanja studentima koji su uspješno okončali I ciklus studija, integrirani studij i II ciklus studija dostavlja fakultet, akademija, centar sa tačno izračunatim postignutim prosjekom ocjena iz svih predmeta I ciklusa studija i tačno izračunatim postignutim prosjekom ocjena iz svih predmeta I i II ciklusa studija i integriranog studija, podijeljeno sa brojem predmeta, uz predočenje potvrde Univerzitetskog tele-informatičkog centra (UTIC) kao osiguranje provjera ostvarenog prosjeka ocjena.
- (2) Prijedlog za dodjelu priznanja Univerziteta fizičkom licu obavezno sadrži:
 - biografiju,
 - obrazloženje doprinosa na kojem se temelji prijedlog.
- (3) Prijedlog za dodjelu priznanja Univerziteta pravnom licu obavezno sadrži:
 - naziv i sjedište,
 - djelatnost,
 - obrazloženje doprinosa na kojem se temelji prijedlog.

Član 15.

- (1) Senat Univerziteta donosi odluku o dodjeli priznanja Univerziteta na osnovu izvještaja Odbora.
- (2) Izvještaj Odbora sadrži podatke utvrđene u članovima 4–12. ovog pravilnika.

Član 16.

Dodjela priznanja Univerziteta je svečani čin, a nagrađenim fizičkim i pravnim licima uručuje ih rektor na svečanosti povodom *Dana Univerziteta* ili drugim prigodnim svečanostima.

IV. IZGLED PRIZNANJA I NAGRADA UNIVERZITETA

Član 17.

Zlatna značka nalazi se u zlatnom ramu dimenzija 14 x 18,5 cm. Zlatni logo Univerziteta u Sarajevu prečnika 6,4 cm i pločica sa imenom i prezimenom dobitnika priznanja dimenzija 6 x 2 cm nalaze se unutar rama na platnenoj pliš pozadini tamnoplave boje.

Član 18.

Srebrna značka nalazi se u srebrenom ramu dimenzija 14 x 18,5 cm. Srebrni logo Univerziteta u Sarajevu prečnika 6,4 cm i pločica sa imenom i prezimenom dobitnika priznanja dimenzija 6 x 2 cm nalaze se unutar rama na platnenoj pliš pozadini tamnoplave boje.

Član 19.

Povelja Univerziteta štampa se na kvalitetnom 200 g papiru dimenzija 42 x 29,7 cm, a njen sadržaj čine: naziv i znak Univerziteta, naziv priznanja, ime i prezime studenta, broj i datum izdavanja te potpis rektora i pečat Univerziteta.

Član 20.

Medalja Univerziteta nalazi se u ukrasnoj drvenoj obrađenoj kutiji dimenzija 15,5 x 20,5 cm. Unutar kutije na tamnoplavoj pozadini nalaze se stilizirani zlatni logo Univerziteta u Sarajevu prečnika 6,4 cm i pločica sa imenom i prezimenom dobitnika priznanja.

Član 21.

- (1) *Plaketa Univerziteta* štampa se na kvalitetnom 200 g papiru dimenzija 42 x 29,7 cm, a njen sadržaj čine: naziv i znak Univerziteta, naziv priznanja, ime i prezime fizičkog lica odnosno naziv pravnog lica, kratko obrazloženje iz odluke Senata o dodjeli *Plakete Univerziteta*, broj i datum izdavanja te potpis rektora i pečat Univerziteta.
- (2) Uz *Plaketu Univerziteta* dodjeljuje se i prigodno obilježje reljefnog izgleda sa ugrađenim znakom Univerziteta, a sadrži naziv priznanja, ime i prezime fizičkog lica odnosno naziv pravnog lica.

Član 22.

Zahvalnica Univerziteta štampa se na kvalitetnom 200 g papiru dimenzija 42 x 29,7 cm, a njen sadržaj čine: naziv i znak Univerziteta, naziv priznanja, ime i prezime fizičkog lica odnosno naziv pravnog lica, kratko obrazloženje iz odluke Senata o dodjeli *Zahvalnice Univerziteta*, broj i datum izdavanja te potpis rektora i pečat Univerziteta.

Član 23.

Priznanje *Ambasador Univerziteta* štampa se na kvalitetnom 200 g papiru dimenzija 42 x 29,7 cm, a njegov sadržaj čine: naziv i znak Univerziteta, naziv priznanja, ime i prezime fizičkog lica odnosno naziv pravnog lica, kratko obrazloženje iz odluke Senata o dodjeli priznanja *Ambasador Univerziteta*, broj i datum izdavanja te potpis rektora i pečat Univerziteta.

Član 24.

- (1) *Nagrada za mir i progres Univerziteta* štampa se na kvalitetnom 200 g papiru dimenzija 59,4 x 42 cm, a njen sadržaj čine: naziv i znak Univerziteta, naziv priznanja, ime i prezime fizičkog lica odnosno naziv pravnog lica, kratko obrazloženje iz odluke Senata o dodjeli *Nagrade za mir i progres Univerziteta*, broj i datum izdavanja te potpis rektora i pečat Univerziteta.
- (2) Uz *Nagradu za mir i progres Univerziteta* dodjeljuje se i prigodno obilježje reljefnog izgleda sa ugrađenim znakom Univerziteta, a sadrži naziv priznanja, ime i prezime fizičkog lica odnosno naziv pravnog lica.

V. ODBOR ZA DODJELU UNIVERZITETSKIH PRIZNANJA

Član 25.

- (1) Odbor za dodjelu priznanja i nagrada Univerziteta (u daljnjem tekstu: Odbor) ima devet članova, a imenuje ga Senat Univerziteta.
- (2) Odbor čine:
 - rektor,
 - po jedan predstavnik grupacija nauka i umjetnosti na Univerzitetu, kojeg predlaže odgovarajuće vijeće grupacije nauka i umjetnosti,
 - predstavnik Upravnog odbora Univerziteta i
 - predstavnik Studentskog parlamenta.
- (3) Predsjednik Odbora bira se između članova Odbora na konstituirajućoj sjednici.
- (4) Mandat Odbora traje četiri godine, izuzev mandata predstavnika Studentskog parlamenta čiji mandat traje jednu godinu.

Član 26.

Nadležnost Odbora je da:

- a) predlaže dodjelu, vrstu i kriterije priznanja na Univerzitetu i
- b) Senatu podnosi izvještaj o realizaciji aktivnosti.

Član 27.

- (1) Odbor o pitanjima iz svoje nadležnosti odlučuje na sjednicama.
- (2) Sjednice se održavaju najmanje jednom u semestru, a po potrebi i više puta u zavisnosti od dostavljenog materijala.
- (3) Sjednice se održavaju na mjestu određenom u pozivu za sjednicu, a po ukazanoj potrebi mogu se održati i elektronskim putem.
- (4) Sjednica Odbora može se održati ako joj prisustvuje većina od ukupnog broja članova Odbora.
- (5) Odbor donosi odluke natpolovičnom većinom od ukupnog broja svih članova odbora.

Član 28.

Stručne i administrativne poslove za rad Odbora i postupak dodjele priznanja Univerziteta obavlja Kabinet rektora Univerziteta, a Služba za izdavačku djelatnost obavlja poslove koji se odnose na štampanje priznanja.

Član 29.

- (1) Rektorat Univerziteta vodi posebnu evidenciju o dodjeljivanju priznanja Univerziteta.
- (2) Odluke o dodjeljivanju priznanja Univerziteta objavljuju se na veb-stranici Univerziteta.

VI. PRELAZNE I ZAVRŠNE ODREDBE

Član 30.

Izmjene i dopune ovog pravilnika donose se na način i po postupku utvrđenom za njegovo donošenje.

Član 31.

Ovaj pravilnik stupa na snagu danom donošenja.

Član 32.

Stupanjem na snagu ovog pravilnika prestaje sa važenjem Pravilnik broj: 01-38-2828/14 od 16. 07. 2014. godine.

REKTOR


Prof. dr. Rifat Škrijelj



Broj: 01-2-35-1/21

Sarajevo, 24. 02. 2021. godine